

Titus

Akwerlp kwaty alay ampepel, apmer itnan Crete. Artwa ingwer itnan Titus apmer Crete-areny anenh. Paul-el pip thwenek Titus-warl, ingkart arrernetyek apmer ikwer-areny-rnem, rernem angka Akngey-kenh arrayat-angkwarr apentetyek.

¹ Ayeng Paul Akngey-kenh warrkenh, Jesus Christ-kenh angkakert. Atha Akngey-kenh angka arrayat akalty-anthetyek, rernem Ingkart-angkwarr arrayat innga apenterl-ayntetyek, iterl-arayntetyek.

² Awank-akerr Akngeyel arrwekel anwenhanterr alhelek, ingkerrenh itethiletiek, anwantherr intem-antey iteth anayntetyek. Akngeyel ileyel innga, irrtwyerremel iley-angenh.

³ Akngeyel angka anwekantherr arrwekel ar-rernek, anwantherr renh iterl-aretyek arrayat innga. Aley anwantherr-anem Akngey-kenh angka iterl-aretyek innga. Akngeyel ayenh ilantheek, atha arrenhantherr ingkerrenh angka mwerr-angker akalty-anthetyek.

⁴ Titus, athan pip nhenh ngkweng-warl thwenem. Ingkart-areny arrpemar ngan, ayeng-apeny. Aylanth Akngey anyent tnakeyelar, ikwerant inkwerelheyelar. Ingkart Akngeyel ngenh arntarnt-arem, atnyenem Jesus Christ-elthen, nga mwerr-angkwarr anetyek Christ Jesus-angkwarr.

Titus-el ingkart-rnem rnkernetyek

⁵ Apmer Crete-itwek atha ngenh iwerl-alhek, ntwá warrk ngkwenh ywerrelhiletiek, ingkart-rnem-anem rnkerneynetyek, rernem tawen arpanenhel warrkirr-ayntetyek.

⁶ Rernem mwerr-angkwarr anetyek ingkerrenh, ampernem-then ingkerrenh. Rernem anew ikwer-rnem-kenh-akert anayntetyek Inkart-kenh-angkwarr-antey. Ampernem apmwangkwarr apentey-angenh anetyek, ingwerel-rnem nthakenh ayntarrp-ilemel iley-angenh anayntetyek.

⁷ Artwa tyaty-areny Inkart-kenh atyetyart rernem ayntarrp-ilemel iley-angenh anayntetyek, Akngey-kenh angkant rernem ilayntetyek, ahelirrey-angenh anayntetyek, tnakelhey-angenh anayntetyek, man anyelkel iney-angenh ingwer-rnem-kenh.

⁸ Rernem mwerr-angkwarr anayntetyek, ingwer-rnem-akert, renh-rnem arntarnt-aretyek ingkerrenh, angka mwerr nhek inkwerelhemel awelhetyek. Rernem ikwa arraty-angkwarrant itengirretyek, apmwangkwarr apentey-angenh.

⁹ Rernem angka arratyant apent-ayntetyek, ingwer-rnemek awelhey-angenh, rernem ingwer-rnem angka arraty akalty-anthayntetyek, ingwer-rnem rernem ilpertelhilerl-anekerr Akngey-kenh angkekety.

¹⁰ Ingwer-rnemel Jew-rnem-angkwarr apenteyel-rnem rernem apmwangkwarr akalty-antheyel.

¹¹ Rernem manekant iterreyel, Rernem alak-
enh akalty-antheyel, ingwerel-rnem renh-rnem

man anthayntetyek. Arrantherr renh-rnem artweriletyek, rernem apmwangkwarr akalty-antheyel-kety.

¹² Awank-akerr artwa apmer Crete-areny anyent, artwa tyak ra angkek, "Crete-areny-rnem irrtwyerremel iley-angker-rnem. Rernem ankety, warrkirrey-angenh-anem, atnwenth ateralth-rnem-apeny. Rernem apmwangkwarr mpwareyel."

¹³ Angka nhenh arraty inngarl aynteyel. Ntwa Inggart-areny-rnem artewentyel akalty-anthayntetyek, Akngey-kenh angkek, arraty innga, rernem Akngey-angkwarr arraty anetyek.

¹⁴ Renh-rnem ilay, Jew-rnem-kenh angkek awelhey-angenh anetyek. Angka ilenhan rerne-marrp mpwarek arraty-wenyarl. Angka Jesus-akert arratyekant awelh-ayntenherr-arey.

¹⁵ Rernem apmwangkwarr akalty-antheyel. Amern-then aker-then alhewer arlkwetyek, mwerr-angkwarr apenterl-ayntetyek. Amern-then aker-then arlkwemel, nthakenh Akngey-angkwarr apmwelhiley-angenh.

¹⁶ Rerneman ilelhem, rernem Akngeyek akalty-arrpanteyarl. Anantherr areyel, rernemarl apmwangkwarr apenteyel arraty-angkwarr-arrpantey, rernem Akngeyek akwerrp inngarl aneyel. Rernem Akngeyek awelhey-angenh. Rernem mwerr-angkwarr Akngeyek lwewarrernelhey-angenh.

Titus-el Ingkart-areny-rnem ingkerrenh akalty-anthetyek

¹ Titus-ay, arraty-angkwarr ntwā akalty-anthayntetyek angka Jesus-akert.

² Artwa ampwernem ingkerrenh ilay, wayn akngerr antywey-angenh, rernem iylpareth anayntetyek, Akngey-kenh-angkwarr, rernem arraty-angkwarr apenterl-ayntetyek ipmelhey-angenh.

³ Arelh ampwernem ilay, rernem mwerr-angkwarr anayntetyek, Ingkartek intem-antey iterrerl-ayntetyek, rernem angka ingwerek iley-angenh anayntetyek, rernem ngkwarl wayn akngerrek artewentyel inkwerelhey-angenh anayntetyek.

⁴⁻⁵ Rernem arelh-rnem arraty-angkwarr akalty-anthayntetyek, rernem mwerr iterretyek, rernem anew ikwer-rnem-kenhek inkwerelhemel awelhetyek, ampa ikwer-rnem-kenhek inkwerelhetyek, arraty-angkwarr itengirretyek, warl ikwer-rnem-kenh arntarnt-aretyek, anew ikwer-rnem-kenhek awelhetyek. Rernem alakenh arraty apententy, ingwer-rnemel kel renh-rnem arraty-angkwarr tnakem, Akngey-kenh angkek irrpelthirrey-angenh anetyek.

⁶ Artwa anthety-rnem ilay, rernem arternpel ilayntetyek, arraty-angkwarr apenterl-ayntetyek.

⁷ Nga mwerr-angkwarr anenty, ingwerel-rnem ngenh mwerr-angkwarr apentem. Ntwā ngkwenh-rnem arraty-angkwarr akalty-

anthetyek, rernem arraty-angkwarr ngenh apenterl-ayntetyek arrpemarl.

⁸ Angka mwerr-angkwarr angkaynta ingwer-rnemek, angka apmwangkwarr angkey-angenh, apmwernemel ngenh ywarn ayntarrp-ilekerr, apmwangkwarr ntwā akalty-antherl-anenty-arrpantey.

⁹ Artwa warrkenh-rnem akalty-anthay, rernem atyetyart-rnemek awelh-ayntetyek, ikwer-rnem angkep angkeyney-angenh.

¹⁰ Anyelkel ikwer-rnem-they iney-angenh, mwerr-angkwarr anayntetyek. Rernem mwerr-angkwarr apententy, ingwer-rnem rernemap iterl-arem-anem Akngey-kenh angka renh, “Arraty inngarl nhel-rneman apenteyel.”

¹¹ Akngey ingkerrenhek inkwerelheyel, rap ahern-areny ingkerrenh itethiletyek.

¹² Ra anwenhantherr akalty-anthek, anwantherr apmwekety ipmelhetyek arraty-angkwarr, mwerr-angkwarr, ahern nhel anetyek.

¹³ Anwantherr iterl-areyel, anwantherr ingkerrenh alerl-antey ikwer mpwelheyel, rarl rlterrk ilkwakert apey-alpeyennek, Jesus Christ, itethiley-angker ilkwa anwekantherrenh.

¹⁴ Ran katy ilwek anwekantherr, anwenhantherr apmwekety itethiletyek. Ra anwekantherr ilkelhek, anwantherr ikwerenh-rnem anayntetyek, ikwerenh-angkwarr arraty apent-ayntetyek.

¹⁵ Ingwer-rnem arraty-angkwarr akalty-anthetyek ywerreyek-atwety. Renh-rnem ilay, mwerr-angkwarr rernem anetyek rlterrk, rernem arntarnt-arelh-ayntetyek. Ingwer

akengenty angkenty, ikwer arrkngert angketyek, artweriletiek. Nyerrirrey-angenh renh-rnem ilay, arraty-angkwarr!

3

Mwerr-angkwarr apentetyek

¹ Ntwa renh-rnem akalty-antha, rernem atyetyart ilkwernemek inkwerelhemel iylpareth awelh-ayntetyek.

² Rernem mwerrant-arey ingkerrenh anayntetyek, ilterrey-angenh.

³ Awank anwantherr apmwangkwarr anenh. Ampwal ingwer-kenh-they anwantherr alhar-lkwerrenh. Anwantherr artwerrety anenh, ingwer-rnem-kety arlkarirrenh, ingwer-rnem anwekantherrety arlkarirrenh arrpemar.

⁴⁻⁶ Ikwer-theyan Akngeyel Jesus renh thwenek anwekantherr-warl, anwenhantherr itethiletiek, anwantherr arraty Akngey-angkwarr anayntetyek anwekantherrenh-angkwarr-weny, ikwerenh-angkwarrant anwantherr anayntetyek. Anwekantherr-angkwarr nthakenh anwantherr iteth intem-antey aney-angenh. Ran anwenhantherr arntarnt-arenh. Ingkart Akngeyel Itnweng renh thwenek, Jesus-angkwarr, anwenhantherr lyerteniyiletiek, anwantherr iteth intem-antey anayntetyek.

⁷ Akngeyel anwenhantherr atnyeneyel ipmelhey-angenhel, anwantherr arraty Akngey-angkwarr anayntetyek, anwantherr iterl-aretyek

anwantherr ikwer-itwek intem-antey aney-
alpetyek.

⁸ Angka nhenh arraty inngarl ayntheyel. Ayeng ilkelheyel ntwā angka nhenh rlterrk innga akalty-anthayntetyek, Jesus-arl tnakeyel-rnem rernem mwerr-angkwarr apentetyek, ingwer-rnem arntarnt-aretyek. Angka nhenh rlterrk innga athan ileyel, impen-angkwarr.

⁹ Arrwekeleny-rnem-kenh angkethey ilterrey-angenh anayntetyek, Jew-rnem-kenh-they, amentirretyek Jew ikwer-rnem-they.

¹⁰⁻¹¹ Ahel iltey-angker-rnem rernem apmwangkwarrarl iterreyel, ahel atwerrerrl-ayntetyekantarl. Alakenh-angkwarrarl rernem apmwelhileyel. Renh-rnem artweriletyek, “Ahel ilterrey-angenh, anwantherr anetyek mwerrant-arey.” Rernem ngkweng awelhey-angenh irrpelthirremel, ntwap renh-rnem iletyek arrpemarl anyent-ingerr-antey. Ikwer-theyan ament-anem ikwer-rnem-kety anayntetyek.

¹² Atha artwa Artemas, artwa Tychicus apek ngkweng-warl thwenem. Apetyay, ayenh rlwa-tetyek apmer Nicopolis-itwek. Ayeng ilenhel ngwang aneyenh alyangk-w-kety.

¹³ Zenas court-areny-then Apollos-atherr renh-atherr ntwā arntarnt-araynta, ampwal ilek-ilek renh-atherr antha, rernem Akngey-kenh angka ilerl-apayntetyek.

¹⁴ Ingkerrenh mwerr-angkwarr aleth akaltyirretyek, ingwer-rnem arntarnt-arayntetyek, rernem apatemel anerl-anekerr.

¹⁵ Atyeng-angkwarr aneyel-rnem, rernem ngkweng inkwerelheyel. Apmer-areny ilenh-rnem-

warl Jesus renharl tnakeyel-rnemek ntwā angka
mwerr-angkwarr iley-alha.

Akngeyel arrenhantherr mwantysel arntarnt-
arem.

Alyawarr Bible

Portions of the Holy Bible in the Alyawarr language of Australia

copyright © 2009 Wycliffe Bible Translators

Language: Alyawarr

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-11-10

PDF generated using Haiola and XeLaTeX on 19 Dec 2025 from source files dated 12 Dec 2025

284d4e02-292d-5bd8-a8a6-8360a307b937